

黃帝問曰太虛寥廓五運廻薄衰盛不同損益相從願聞
平氣何如而名何如而紀也歧伯對曰昭乎哉問也木曰
敷和火曰升明土曰備化金曰審平水曰靜順帝曰其不
及柰何歧伯曰木曰委和火曰伏明土曰卑監金曰從革
水曰潤流帝曰太過何謂歧伯曰木曰發生火曰赫曦土
曰敦阜金曰堅成水曰流衍

此言歲分平氣太過不及而有三氣之紀名也太虛者
張橫渠所謂由太虛有天之名也廻薄者廻遠而依薄
也氣盛則損氣衰則益故氣之平必有名以紀之伯言
木歲平氣名曰敷和敷布其和氣也火歲平氣名曰升

明火升而顯明也。土歲平氣名曰備化土以化物爲德。其化及羣品而周備也。金歲平氣名曰審平。氣至金而平定。而其氣詳審也。水歲平氣名曰靜順。水性本順。而其氣又沉靜也。至于木歲不及名曰委和。蓋氣以敷和爲平。而不及則和氣委屈也。火歲不及名曰伏明。蓋氣以升明爲平。而不及則明顯有所伏也。土歲不及名曰卑監。土于五運爲尊。而不及則氣之卑者得以制之也。金氣不及名曰從革。金性至剛。而不及則從彼氣以變革也。水氣不及名曰涸流。水以流衍爲性。而不及則水少而流涸也。至于歲木太過。名曰發生。木主生氣。而木

盛則發生也歲火太過名曰赫曦曦乃日光而其氣尤
烜赫也歲土太過名曰敦阜土本高厚而其氣尤敦厚
也歲金太過名曰堅成金以成物爲德而氣盛則甚堅
也歲水太過名曰流衍水盛則洋衍洋溢也

帝曰三氣之紀願聞其候歧伯曰悉乎哉問也敷和之紀
木德周行陽舒陰布五化宣平其氣端其性隨其用曲直
其化生榮其類草木其政發散其候溫和其令風其藏肝
肝其畏清其主目其穀麻其果李其實核其應春其蟲毛
其畜犬其色蒼其養筋其病裏急支滿其味酸其音角其
物中堅其數八升明之紀正陽而治德施周普五化均衡

其氣高其性速其用燔灼其化蕃茂其類火其政明曜其
候炎暑其令熱其藏心心其畏寒其主舌其穀麥其果杏
其實絡其應夏其蟲羽其畜馬其色赤其養血其病潤
切 癰其味苦其音徵其物脉其數七備化之紀氣協天休
德流四政五化齊脩其氣平其性順其用高下其化豐滿
其類土其政安靜其候溽蒸其令濕其藏脾脾其畏風其
主口其穀稷其果棗其實肉其應長夏其蟲倮其畜牛其
色黃其養肉其病否其味甘其音宮其物膚其數五審平
之紀收而不爭殺而無犯五化宣明其氣潔其性剛其用
散落其化堅斂其類金其政勁肅其候清切其令燥其藏

如白

肺肺其畏熱其主鼻其穀稻其果桃其實殼其應秋其蟲
介其畜鷄其色白其養皮毛其病欬其味辛其音商其物
外堅其數九靜順之紀臟而勿害治而善下五化咸整其
氣明其性下其用沃衍其化凝堅其類水其政流演其候
凝肅其令寒其藏腎腎其畏濕其主二陰其穀豆其果栗
其實濡其應冬其蟲鱗其畜彘其色黑其養骨髓其病厥
其味鹹其音羽其物濡其數六故生而勿殺長而勿罰化
而勿治收而勿害藏而勿抑是謂平氣

名後世
作痞

此詳言歲運平氣之紀也木氣之平爲敷和之紀故木
德周行陽氣舒而陰氣布凡生長化收藏之五化無不

宣平

新校正云按王註太過不及各紀年辰此平木運註不記年辰者平氣之歲不可以定紀也或者欲

補註云謂丁巳丁卯王寅壬申歲者是未達也

木之氣端正木之性順從木之

用曲直咸宜木之化生發榮美五行之木類同草木木

之政主于發散木之候主于溫和在天之令爲風在人

之藏爲肝肝之性暄故畏金令之清冷肝之外候爲目

在五穀爲麻在五果爲李凡果必有核其實核當堅在

五時爲春在五蟲爲毛在五畜爲犬在五色爲蒼肝主

筋故人之當養者在筋不養則病病則爲裏急支滿也

在五味爲酸在五音爲角凡物得木氣者其中必堅天

以三生水而地以八成之故其數八火氣之平爲升明

之紀故火主南方爲正陽乃正陽衡治德之所施者周
普凡生長化收藏之五化無不均五火之氣甚高火之
性最速火之用燔灼火之化蕃茂五行之火類與火同
火之政明曜火之候炎暑火之令熱在人之藏爲心心
屬火火畏水水性寒故心畏寒舌爲心竅故其主在舌
在五穀爲麥在五果爲杏其實中當有絡在五時爲夏
在五蟲爲羽在五畜爲馬在五色爲赤心主血脉故所
養在血脉血脉不養則病形于目爲瞶形于體爲癰在
五味爲苦在五音爲徵凡物得火氣者其物多脉上文
之實爲絡此云其物爲脉脉與絡地以二生火而天以
同主凡物而言不止于果之實也

七成之故其數七。土氣之平爲備化之紀。以土爲化氣也。天主生土爲地主成。天主覆土爲地主載。其化氣協于上天之休德。土主于四時故德流于四政。凡生長化收藏之五化無不齊脩。土之氣平正。土之性柔順。土之用可高可下。土之化爲豐爲滿。五行之土類同于土。土之政主于安靜。土之候溽濕蒸熟。土之令以濕。在人之藏爲脾。脾主土。木主風故木能尅土則脾之所畏者惟風。口爲脾竅故其主在口。在五穀爲稷。在五果爲棗。土主肉故果之實多肉。在五時爲長夏。在五蟲爲倮。在五畜爲牛。在五色爲黃。脾主土又主肉故所養在肉。脾不

養則其病爲否塞。在五味爲甘。在五音爲宮。凡物得土氣者。則其膚必厚。天以五生土。而地以十成之。故其數五。土常以生也。金氣之平。爲審平之紀。收氣者。金氣也。殺氣者。亦金氣也。惟氣得其平。故收而不爭。殺而無犯。凡生長化收藏之五化。無不宣明。金之氣潔。金之性剛。金之用則散落。金之化爲堅歛。五行之金。類同于金。金之政勁肅。金之候清切。金之令爲燥。在人之藏。屬于肺。肺屬金。金畏火。火主熱。故畏熱。鼻爲肺竅。故其主鼻。在五穀爲稻。在五果爲桃。金性堅。其果實之殼當堅。在五時爲秋。在五蟲爲介。在五畜爲鷄。在五色爲白。肺主皮。

毛故所養者當在皮毛皮毛不養則傷肺故其病欬在

五味爲辛在五音爲商凡外得金之氣者其外必堅

上卽

文實穀之義
王凡物言

地以四爲金而天以九成之故其數九水

氣之平爲靜順之紀藏氣者水氣也唯氣之平故藏而
勿害水性下故治而善下凡生長化收藏之五化咸各
整齊水之氣明水之性下水之用沃衍水之化凝堅五
行之水類同于水水之政流演水之候凝肅水之令寒
在人之藏爲腎腎屬水土性濕故腎畏濕腎開竅十二
陰故其主在二陰在五穀爲豆在五果爲栗水以濡之
故其實必濡在五時爲冬在五蟲爲鱗在五畜爲彘在

五色爲黑。腎主骨髓。故所養在于骨髓。腎爲足經。故其氣逆。則病爲厥。在五味爲鹹。在五音爲羽。凡物得水氣者。皆濡而潤。天以一生水。而地以六成之。故其數六。凡此平氣之歲。唯生氣主歲。則木氣平。金爲收氣者。不能縱其殺。長氣主歲。則火氣平。水爲藏氣者。不能縱其罰。化氣主歲。則土氣平。木爲生氣者。不能縱其制。收氣主歲。則金氣平。火爲長氣者。不能縱其害。藏氣主歲。則水氣平。土爲化氣者。不能縱其抑。是謂天氣平。地氣正。五化之氣。不以勝尅爲用。故曰平氣也。

委和之紀。是謂勝生。生氣不政。化氣廼揚。長氣不平。收令

乃早涼雨時降風雨並興草木晚榮蒼乾凋落物秀而實
膚肉內充其氣斂其用聚其動縵戾拘緩其發驚駭其藏
肝其果棗李其實核殼其穀稷稻其味酸辛其色蒼白其
畜犬駭其蟲毛介其主霧露淒滄其聲角商其病搖動疰
恐從金化也少角與判商同上角與正角同上商與正商
同其病支發癰腫瘡瘍其甘蟲邪傷肝也上宮與正宮同
蕭颺肅殺則炎赫沸騰青于三所謂復也其主飛蠹蛆雉
乃爲雷霆伏明之紀是謂勝長長氣不宜藏氣反布收氣
自政化令乃衡寒清數舉暑令乃薄承化物生生而不長
成實而稚遇化已老陽氣屈伏蟄蟲早藏其氣鬱其用暴

其動彰伏變易其發痛其藏心其果栗桃其實絡濡其穀
豆稻其味苦鹹其色玄丹其畜馬彘其蟲羽鱗其主冰雪
霜寒其聲徵羽其病昏惑悲忘從水化也少徵與少羽同
上商與正商同邪傷心也凝慘凜冽則暴雨霖霽青于七
其主驟注雷霆震驚沉黔同陰淫雨卑監之紀是謂減化化

氣不令生政獨彰長氣整雨乃愆收氣平風寒並興草木
榮美秀而不實成而秕也其氣散其用靜定其動瘍涌分
潰癰腫其發濡滯其藏脾其果李栗其實濡核其穀豆麻
其味酸甘其色蒼黃其畜牛犬其蟲保毛其主飄怒振發
其聲宮角其病留滿否塞從木化也少宮與少角同上宮

與正宮同上角與正角同其病飧泄邪傷脾也振拉飄揚
則蒼乾散落其青四維其主敗折虎狼清氣乃用生政乃
辱從革之紀是謂折收收氣廼後生氣廼揚長化合德火
政廼宣庶類以蕃其氣揚其用躁切其動鏗禁務音厥其
發欬喘其厥肺其果李杏其實殼絡其穀麻麥其味苦辛
其色白丹其畜鷄羊其蟲介羽其主明曜炎爍其聲商徵
其病噎欬鼯鼠從火化也少商與少徵同上商與正商同
上角與正角同邪傷肺也炎光赫烈則冰雪霜雹青于九
其主鱗伏彘鼠歲氣早至廼生大寒涸流之紀是謂反陽
藏令不舉化氣廼昌長氣宣布蟄蟲不藏土潤水泉臧草

木條茂榮秀滿盛其氣滯其用滲泄其動堅止其發燥槁其藏腎其果棗杏其實濡肉其穀黍稷其味甘鹹其色黔玄其畜羴牛其蟲鱗倮其主埃鬱昏翳其聲羽宮其病痿厥堅下從土化也少羽與少宮同上宮與正宮同其病癰閼邪傷腎也埃昏驟雨則振拉摧拔肯于一其主毛顯狐貉變化不藏故乘危而行不速而至暴虐無德災反及之微者復微甚者復甚氣之常也

此詳言歲運不及之紀也歲木不及爲委和之紀生氣者木氣也化氣者土氣也長氣者火氣也收氣者金氣也木氣不及金能勝之是謂勝生乃丁卯丁酉丁巳丁

亥丁丑丁未之歲也蓋丁壬爲木連而丁乃木之不及
故金得以勝之其生氣不政者失其政也化氣乃揚木
不勝土故土寬則化氣揚也木衰則火不盛故長氣自
平木衰則金盛故收令乃早涼爲金化雲雨爲濕氣風
爲木令三氣並行故涼雨時降風雲並興也草木爲木
之類金尅之而其榮最晚蒼乾凋落者多凡物之秀者
必有成實其膚肉內充以土氣揚而金氣堅也其氣收
歛其用翕聚兼金氣也其動縵戾拘緩王註云縵縮短也戾繚戾也拘
急也緩不收也其發驚駭
金實真言論曰其病發驚駭木象屈伸金又勝之病宜若是其藏
之病者在肝凡五果五穀五味五色五畜五蟲五音之